

**Talamdan sa
Mga Mensahe alang sa Full-time Training
sa Spring Term sa 2026**

**LINANGKOB NGA HISGOTANAN:
ANG MAHINUNG DANONG MGA PUNTO SA KAMATUORAN SA MGA SULAT NI PABLO—
UNA UG IKADUHANG TESALONICA**

Mensahe 11

Mapalig-on ang Atong Kasingkasing nga Dili Masaway diha sa Pagkabalaan

Basahong Kasulatan: 1 Tes. 3:13; Mar. 4:1-20

I. Aron makakinabuhi sa balaang kinabuhi alang sa iglesiahang kinabuhi, gikinahanglan nato ang Ginoo nga maglig-on sa atong kasingkasing nga dili masaway diha sa pagkabalaan—1 Tes. 3:13:

- A. Dili gyod mausab ang Dios, apan segun sa natural nga pagkatawo nato, mausab-usab ang atong kasingkasing, sa relasyon nato sa uban ug sa Ginoo—Mat. 13:3-9, 18-23.
- B. Segun sa natural ug tawhanon niyang kinabuhi, walay tawo nga lig-og kasingkasing; kay dali ra man kaayong mausab-usab ang atong kasingkasing, dili gyod kini kasaligan—Jer. 17:9-10; 13:23.
- C. Salawayon ang atong kasingkasing kay mausab-usab man kini; ang dili mausab nga kasingkasing kana mang kasingkasing nga dili masaway—Sal. 57:7; 108:1; 112:7; itandi sa 2 Tim. 4:10a; Col. 4:14; Filem. 24.
- D. Sa kaluwasan sa Dios kas-a ug hangtod na sa dayon ang pagbag-o sa kasingkasing; apan, sa kasinatian nato padayon kining gibag-o kay mausab-usab man kini—Ezeq. 36:26; 2 Cor. 4:16.
- E. Kay mausab-usab man ang atong kasingkasing, padayon gyod kining bag-ohon sa nagbalaang Espiritu aron magmalig-on kun matukod kini sa kahimtang nga balaan, ginahin ngadto sa Dios, naokupahan sa Dios, napanag-iyas sa Dios, ug nasuropan og Dios—Tito 3:5; Efe. 4:23; 5:26; 2 Cor. 4:10-12, 16; Rom. 6:19, 22; itandi sa Mat. 15:7-8.

II. Dunay duha ka dagkong ilhanan sa nabag-ong kasingkasing nga gilig-on nga dili masaway diha sa pagkabalaan—kasingkasing nga niliso ngadto sa Dios ang nabag-ong kasingkasing, ug nagtinguhag kaputli ang nabag-ong kasingkasing:

- A. "Basahon na ngani si Moises, dunay taptap nga nagpabilin sa ilang kasingkasing; apan moliso ngani sa Ginoo ang ilang kasingkasing, makuha ang taptap...Apan kitang tanan nga dunay nawong nga wala mataptapi, nga nagtan-aw ug nagpasumbalik samag salamin sa himaya sa Ginoo, kamulong gitransporma ngadto sa mao ra nga dagway gikan sa himaya ngadto sa himaya, ingon nga gikan gyod sa Ginoong Espiritu"—2 Cor. 3:15-16, 18.
- B. Ang tiunayng kahulogan sa paghinulsol mao ang pag-usab sa hunahuna nga moresulta sa pagbasol, sa pag-usab sa tinguha; pagliso kini sa atong kasingkasing gikan sa tanang butang nga dili Dios ug sa tanang butang nga gawas sa Dios ngadto sa Dios mismo; "paghinulsol kini ngadto sa Dios" (Buh. 20:21), sa pagkatinuod, pagbalik gikan sa tanang butang ngadto sa Dios; diosnong gikinahanglan sa pamatigayon sa Dios sa Bag-ong Tugon ang paghinulsol (17:30):
 1. Ang paghinulsol maoy resulta sa nangitang pagbalaan sa Espiritu; gasa kini nga hinatag sa gituboy nga Cristo (5:31); "nan, gihatagan sab diay sa Dios ang mga Gentil og paghinulsol ngadto sa kinabuhi" (11:18); *zoe* (Gk.) ang *kinabuhi* dinhi, nga nagpasabot sa kinabuhi sa Dios (Efe. 4:18), sa walay kataposang kinabuhi (1 Juan 1:2), sa dili linalang ug dili malaglag nga kinabuhi (Heb. 7:16), nga mao si Cristo mismo (Juan 14:6; 11:25; Col. 3:4) nga Espiritung taghatag-og-kinabuhi (1 Cor. 15:45)
 2. Gipakita sa Bag-ong Tugon nga dili ang mga dili magtutuo ra kondili ang matinguhaon ug espirituhanong mga magtutuo sab ang kanunayng nagkinahanglan nga maghinulsol; sa mga

sulat sa Bugna 2 ug 3, gipahinulsol sa Ginoo ang kadaghanan sa pito ka iglesia—2:5, 16, 21; 3:3, 19.

- C. Bug-at nga pasidaan ang Mga Hebreohanon 3:7-19 kanato kalabot sa peligro sa pagpagahi sa atong kasingkasing ug sa pagbaton og daotang kasingkasing sa pagkawalay-pagtuo—“Gisulti sa Espiritu Santo, ‘Karong adlaw kon makadungog mo sa Iyang tingog, ayaw pagahia ang inyong kasingkasing’...Pagbantay, mga igsoon, kay basin naa sa usa ninyo ang daotang kasingkasing sa pagkawalay-pagtuo nga mopalayo sa Dios nga buhi. Apan magtinambagay mo sa usag usa matag adlaw, samtang giingon pa kinig ‘karong adlaw,’ aron walay usa ninyo nga magmagahi tungod sa pagkamalinglahon sa sala” (vv. 7-8, 12-13); nagpasabot ang *mopalayo* og “molingiw.”
- D. “Bulahan ang mga putli sa kasingkasing, kay makakita sila sa Dios”; ang putling kasingkasing yano nga kasingkasing nga walay sambog, kasingkasing nga nagtinguha ra sa Ginoo ug ang Ginoo ray bugtong-talagsaong tumong—Mat. 5:8; 1 Tim. 5:22b; 2 Tim. 2:22; itandi sa Juan 17:15; Jud. 24:

1. Labi nga maanaa sa pulong sa Dios ang tawo, maglabi sab siya kaputli; kon balikbalikon natog basa ang pulong sa Ginoo, makuha ang tanang kalibotanong butang dinhi nato, ug mahinloan ug mabalaan ta:
 - a. Gibalaan ta sa pulong sa realidad gikan sa gubot nga kalibotan, gipabalik ta sa kaputli sa Dios; gihatagan sa Ginoo ang mga magtutuo og duha ka matang sa pulong: ang permanenteng pulong (Juan 17:14, 17) ug ang dihadhang mga pulong (v. 8).
 - b. Nagbuhat ang buhing pulong sa Dios diha sa mga magtutuo aron igahin sila gikan sa kalibotan ug sa pag-ilog niini ngadto sa Dios ug sa Iyang tuyo, dili lang sa posisyon (Mat. 23:17, 19) kondili sa disposisyon sab (Efe. 5:26; 1 Tes. 5:23; Rom. 6:19, 22).
2. Salmo 12:6—“Lunsayng mga pulong ang mga pulong ni Jehova, / Salaping inulay sa hudno sa yuta, / Giulay sa makapito.”
3. Salmo 119:9—“Unsay iputli sa batan-on sa iyang ginawian? / Pinaagi sa pagbantay niini subay sa Imong pulong.”
4. Salmo 119:11—“Gitipigan ko ang Imong pulong sa akong kasingkasing / Aron dili ko makasala batok Nimo.”
5. Salmo 119:72—“Labaw pa kamaayo alang nako ang kasugoan sa Imong baba / Kaysa linibo nga bulawan ug salapi.”
6. Salmo 119:127—“Busa gihigugma ko ang Imong mga sugo / Labaw pa sa bulawan, oo, labaw pa sa inulay nga bulawan.”
7. Salmo 119:130—“Naghatag og kahayag ang pagbukas sa Imong mga pulong, / Naghatag og pagpanabot sa mga yano.”
8. Salmo 119:133—“Iestablisar ang akong mga lakang sa Imong pulong, / Ug ayaw pagahoma kanako ang bisan unsang kadaotan.”
9. Salmo 119:140—“Putli kaayo ang Imong pulong, / Ug nahigugma niini ang Imong sulugoon.”
10. Mateo 12:34-35—“Mosulti ang baba gikan sa kadagaya sa kasingkasing. Magpagula ang maayong tawo og maayong mga butang gikan sa maayo niyang tinipigan, ug magpagula ang daotang tawo og daotang mga butang gikan sa daotan niyang tinipigan.”

III. Aron makakinabuhi ta sa kinabuhing hingpit nga sumala sa ug alang sa pamatigayon sa Dios sa Bag-ong Tugon nga dunay kasingkasing nga gilig-on, patuboon gyod nato sa yuta sa tibuok natong kasingkasing ang nagpuyo-sa-sulod nga Cristo nga binhi sa kinabuhi aron mabuhi Siya sa sulod nato ug mapadayag gikan sa sulod nato, sa ingon niana mahimong panimalay Niya ug hulad sa kasingkasing sa Dios ang atong kasingkasing—Mar. 4:1-20; 12:30; Efe. 3:16-17:

- A. Atimanon gyod nato ang kahimtang sa atong kasingkasing aron mahimong maayong yuta ang atong kasingkasing aron mahingkod si Cristo sa sulod nato; nagtimaan ang maayong yuta sa kasingkasing

nga naghatag sa tanang bahin niini para modawat sa pulong aron makatubo ug makapamunga kini bisan hangtod sa usa ka gatos ka pilo—Mar. 4:8-9, 20, 26-29; Luc. 8:15; Isa. 37:31.

- B. Nagtimaan ang daplin sa dalan sa kasingkasing nga nagahi tungod sa pakighugoyhugoy sa kalibotan ug dili madinawat aron makasabot unta sa pulong sa gingharian; nagtimaan ang mga langgam sa daotan, ni Satanas, nga nianhi ug nisakmit sa pulong sa gingharian nga napugas sa nagahing kasingkasing—Mar. 4:3-4, 15.
- C. Nagtimaan ang mga sampinit sa mga kabalaka sa panahon, sa pagkamalimbongon sa bahandi, ug sa mga pangibog sa ubang butang, nga nilumos gyod sa pulong, nagpugong niini nga motubo diha sa kasingkasing ug naghimo niining dili mabungahon—vv. 7, 18-19.

IV. "Nangahulog ang ubang binhi sa batoong dapit, nga dili daghag yuta, ug dihadiha niturok kini kay wala may giladmon sa yuta. Ug sa pagsubang sa Adlaw, nainitan kini; ug kay wala may gamot, nalawos kini"—vv. 5-6:

- A. Gihatagan ta sa Ginoo og tulo ka dakong hinungdan nganong dali ra kaayong nitubo ang binhi nga napugas sa batoong dapit, apan nalawos dayon:
 - 1. Ang unang hinungdan mao nga "wala kaayoy yuta"; ang tawong dunay ingon niini nga kasingkasing nagbarog sa mabaw nga dapit; tawo siya nga nagkinabuhi segun sa ug gikontrol sa iyang palibot ug sa iyang mga pagbati; pagkinabuhi kini segun sa atong mga pagbati nga wala makaila sa Ginoo sa sulod; ang batoong mga dapit nga wala kaayoy yuta nagtimaan sa kasingkasing nga mabaw sa pagdawat sa pulong sa Ginoo—vv. 5-6, 16-17.
 - 2. Ang ikaduhang hinungdan sa pagkawalay-bunga mao ang "walay gamot"; nagpasabot ang mga gamot sa ***natagong kinabuhi***; ang mga gamot mao ang mga parte nga dili makita, natago, ug sekreto; nag-agad pag-ayo sa natagong kinabuhi nato atubangan sa Ginoo ang espirituhanong kinabuhi nato:
 - a. Niingon ang Ginoo sa Mateo 6:6 nga sa mag-ampo ta, mosulod gyod ta sa atong kaugalingong lawak, sirhan ang pultahan, ug mag-ampo sa atong Amahan nga naa sa tago, ug mobalos nato ang Amahan nga nakakita sa tago; niingon ang Ginoo nga ***makakita*** nato sa tago ang Amahan; sige tang naghunahuna nga madungog lang ang pag-ampo; apan niingon ang Ginoo dinhi nga makita ang mga pag-ampo.
 - b. Unsa kadakong bahin man sa atong kinabuhi nga ang Dios ray makakita ug wala nay lain? Unsa kadakong bahin sa atong kinabuhi ang espirituhanon atubangan sa Dios ug wala sukad isugilon nato sa mga tawo? Unsa kadaghan sa bililhong mga kasinatian nato nga alang ra gyod sa pagpahimulos sa Dios?—A. A. 4:12, 16.
 - c. Ang Adlaw ug ang makapaig nga kainit niini nagtimaan sa kasakit o paglutos; alang sa pagpatubo ug pagpahinog sa tanom ang kainit sa Adlaw, nga mahitabo kon makagamot nag lalom ang binhi; apan tungod sa kakulang og gamot sa binhi, ang kanit sa Adlaw, nga makapatubo ug makapahinog unta, makapatay hinuon niini.
 - 3. Ang ikatulong hinungdan mao ang batoon nga dapit; ang batoon nga dapit mao ang nagahing kasingkasing; usa ka matang ra sa mga tawo ang motidlom gyod sa kahiladman; sila ang mga humok ug maluyahon sama sa bata, ug sila ang nahadlok ug nangurog sa pulong sa Dios (Luc. 18:17; Isa. 66:1-2); kon wala pa nato hingpit nga makuha ang mga bato (sama sa natagong mga sala, personal nga mga tinguha, pagtinguha sa kaugalingon, ug pagkaluoy sa kaugalingon), ug kon wala pa hingpit nga maatiman ug madugmok sa Ginoo ang gahian nga pagbuot, dili gyod molalom ang atong mga gamot (Sal. 92:12; Os. 14:5; Isa. 37:31).
- B. Aron lalom nga makagamot sa sulod nato si Cristo nga binhi sa kinabuhi, kinahanglan nga lalom tang mogamot diha Niya sa pagkaanaa natoy natagong kinabuhi ug natagong kasaysayan uban Niya—Col. 2:7; A. A. 4:12; Sal. 31:20; 32:7; 83:3; 91:1; 119:114.
- C. Mogugol gyod tag panahon sa tago aron mosuyop sa Ginoo, mogahin og panahon matag buntag aron direkta ug suod nga makig-ambitay sa Ginoo sa pag-ampo-basa ug pagpamalandong nato sa Iyang

Pulong ug mangamuyo alang sa mga tinguha sa pamatigayon sa Dios—Mar. 1:35; Mat. 6:6; Sal. 5:3; 27:4; 46:5; 59:16; 88:13; 90:14; 119:15, 147-148; 143:8; 1 Hari 8:48.

- D. Adlaw-adlaw ug buntag ug gabii, buksan gyod nato kanunay ang atong kasingkasing sa Ginoo sa personal ug suod nga pagpakigsultianay nato Niya ug sa paghinulsol ug pagsugid sa tanan natong sala Kaniya; kini ang paagi sa pagtagad sa atong kasingkasing aron mahimo kining maayong yuta nga katuboan ni Cristo nga binhi sa kinabuhi—(Sal. 102, ulohan; v. 7; 142, ulohan; vv. 2, 7; 139:23-24; 2 Cor. 3:16; 1 Juan 1:9).
- E. Ang paghatag nato sa Ginoo og hingpit nga paagi nga makatubo sa atong kasingkasing maghimo sa atong kasingkasing nga hulad sa kasingkasing sa Dios, ug magkinabuhi ta sa kinabuhing hingpit nga sumala sa ug alang sa pamatigayon sa Dios sa Bag-ong Tugon aron matuman ang gitinguha sa Iyang kasingkasing—*Mga Alawiton*, #395, #1132.